

11. E dulcibus altisque tympanorum pulsatorum sonis colligebatur, prosperitatem illius perpetuo esse duraturam.

12. Sparsis *dúrvæ* graminibus, hordei culmis, ficus cortice, lotorumque calycibus, instituit ille lustrationis cærimonias, senibus inter propinquos præscriptas.

13. Tum ad eum victorem inaugurandum adveniebant *Bráhmani*, carmina triumphalia canentes, sacerdotibus præcedentibus.

14. Aqua fausta magno flumine in caput ejus cum strepitu defluens, splendebat perinde ac *Ganga*, in *Sivæ* caput præcipitata.

15. Eodem momento ille, a præconibus laude elatus, apparebat veluti magna nubes, a *chátakis* salutata.

16. Illius splendor, cum aqua carminibus faustis sacrata lavationem subiret, augebatur, velut ignis fulminei splendor, quando pluvia irrigatur.

17. Inauguratione finita patribus familias tantas dedit divitias, ut largum pro sacrificiis peractis præmium accepisse sibi viderentur.

18. Quam illi læta mente ei tribuebant benedictionem, ea illius factorum eventibus longe superabatur.

19. Imperavit ille eorum, qui in custodia erant, vincula solvi, capitis damnatos supplicio liberari, bubus juga detrahi, vaccasque haud mulgeri.

20. Psittaci etiam reliquæque aves domitæ, in caveis inclusæ, illo jubente libertatem adeptæ, volabant ubicunque iis placebat.

21. Tum ille, ut vestes indueret, consedit in sella eburnea, stragulo tecta, in media aula collocata.

22. Ei, cujus capilli odoribus uncti erant, varios ornatus suggerebant apparitores, manibus aqua ablutis.

23. Capillos ejus, margaritarum linea religatos, coronaque pertextos, ornabant rubino, splendoris radios effundente.

24. Postquam membra ejus *santalo*, moschi odorem spargente, unxissent, *rochanæ* pigmento corpus pingebant.